

खबरां

- प्रधानमंत्री नरेंद्र मोदी होरें कारगिल विजय दिवस पर अज्ज देश दे शूरवीरें गी चेत्ता कीता, उनें आखेआ देश आस्तै उंदे बलिदान सारे भारतीयें गी गौरव मसूस करांदे ना।
- अपने मन की बात कार्यक्रम च मोदी होरें देश गी रक्षा उत्पादन ते अंतरिक्ष क्षेत्र च उंचाई पर पुजाने आस्तै भारती वैज्ञानिकें ते इंजीनियरें दे कट्टे प्रयासों दी प्रशंसा कीती।
- मोदी होरें आखेआ जे खेड्डें ते अंतरराष्ट्री ओलंपिक च बेहतरीन प्रदर्शन करा'रदे भारती नौजवान खडारिएं पर उनेंगी मान ऐ।
- राष्ट्रपति द्रौपदी मुर्मू ते उपराष्ट्रपति सी.पी. राधाकृष्णन होरें पूरे राष्ट्र सने कारगिल युद्ध दरान सर्वोच्च बलिदान देने आले वीर जवानें गी श्रद्धांजलि भेंट कीती।
- सरकार नै भारतीयें गी अपील कीती ऐ जे काला सागर क्षेत्र च चलने आहले ज्हाजें पर कम्म करने दे इच्छुक पहले मौजूदा सुरक्षा जोखिमें दा पूरी सावधानी कन्नै आंकलन ककरी लैन।
- भारती मौसम विभाग नै मध्यीय महाराष्ट्र ते ओडिशा च अज्ज खरी मती बरखा पौने दी मेद दे चलदे रेड अलर्ट जारी कीता ऐ।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

PM-MKB

प्रधानमंत्री नरेंद्र मोदी होरें अज्ज कारगिल विजय दिवस दे मौके पर देसै दे बहादुर जवानें गी चेत्ता करदे होई आखेआ जे भारत लगातार नमियां उपलब्धियां हासल करा'रदा ऐ भाएं ओहू रक्षा उत्पादन होऐ, उंदा निर्यात होऐ जां फही मित्र मुलखें कन्नै सियासी सहयोग होऐ। आकाशवाणी पर अपने मन की बात कार्यक्रम च मोदी होरें आखेआ जे अज्ज 26 जुलाई नेही तरीक ऐ जिसी चेत्ता करने लेई कुसलै कलंडर दी लोड नेई, सगुआं एहू तरीक सबनें दे मनै च कारगिल विजय दिवस रूपै च बसी दी ऐ। मन की बात कार्यक्रम च प्रधानमंत्री मोदी होरें आखेआ जे भारत अपनी तकनीकी क्षमताएं च लगातार सुधार करा'रदा ऐ। उनें हाल च गै आई.एन.एस महेंद्रगिरी गी भारती नौसेना च शामिल कीते जाने बारै गल्ल कीती। प्रधानमंत्री होरें आखेआ जे पिछले ऐतवारें विक्रम-1 दे कामयाब प्रक्षेपण पर हर इक भारती गी बड़ा मान होआ ऐ। मोदी होरें शानदार हुनर, जज्बे ते सब्र दस्सने लेई युवा इन्वोवेटर्स दी बी सराहना कीती। कैच दा रेन अभियान बारै गल्ल करदे होई प्रधानमंत्री होरें दस्सेआ जे 4 जुलाई थमां मुख भरै च एहू बशेष अभियान चलाया जा'रदा ऐ। अपने मन की बात कार्यक्रम च प्रधानमंत्री होरें ग्लासगो च किश दिन पैहले शुरू होई दी कामन वेल्थ खेड्डें दा बी जिक्र कीता ते आखेआ जे इनें खेड्डें च हिस्सा लै'रदे खडारियें दा हर इक भारती उत्साह बधा करदा ऐ। प्रधानमंत्री मोदी होरें अज्ज मन की बात च कश्मीरी चट्टाई वागू दा बी जिक्र कीता ते वोकल फार लोकल गी बढ़ावा देने दी अपील कीती। प्रधानमंत्री होरें खुशी जताई ऐ जे एक पेड़ मां के नाम मुहिम दे जरिए पूरे देश च लोक

पर्यावरण बक्खी अपनी जिम्मेदारी निभा'रदे ना। प्लास्टिक प्रदूषण बारे मोदी होरें चिंता जाहिर कीती ऐ ते इक बारी इस्तेमाल होने आहले प्लास्टिक दा कचरा सालें थमां पर्यावरण गी नुकसान पुजा'रदा ऐ। मोदी होरें इक बारी फही सारेंगी आखेआ जे गणेश भगवान दी पूजा आस्तै पी.ओ.पी दे बजाय देश दी मिट्टी दी बनी दी मूर्तिएं गी चुनन। 7 अगस्त गी राश्ट्री हत्थखड़ी दिवस मनाया जाहगा। प्रधानमंत्री होरें लोकें गी अपील कीती ऐ जे ओहू हत्थें दी बनी दी चीजें दी खरीददारी करिए बुनकरें दा सम्मान करन ते वोक्ल फार लोकल दे जज्बे गी मजबूत करन। प्रधानमंत्री मोदी होरें खादी दा जिक्र करदे होई आखेआ जे खादी महात्मा गांधी होरें गी बड़ी प्यारी ही। प्रधानमंत्री होरें भारत रतन डा. ए.पी.जे अब्दुल कलाम होरें गी बी चेता कीता जिंदी पुण्यतीथि कल ऐ।

<><><><><><>

### Kargil Vijay Diwas

1999 दी कारगिल जंग च अपने प्राणें दा सर्वोच्च बलिदान देने आले भारती जवानें दी बहादुरी ते सम्मान च अज्ज पूरे देश च कारगिल विजय दिवस मनाया जा'रदा ऐ। अज्ज पाकिस्तान पर भारत दी जित्त ते आप्रदेशन विजय दे सफल समापन दी 27मीं बरेगंड ऐ, इस आप्रदेशन दरान भारती सशस्त्र बलें जम्मू-कश्मीर दे कारगिल जिले दे किश प्रदेशें पर कब्जा कीता हा जिंदे च पाकिस्तानी सैनिक ते आतंकवादिएं घुसपैठ कीती ही। इस मौके राश्ट्रपति द्रौपदी मुर्मू, उपराश्ट्रपतिसी.पी राधाकृष्ण, प्रधानमंत्री नरेंद्र मोदी, गृह मंत्री अमित शाह ते लोकसभा स्पीकर ओम बिरला होरें शहीद जवानें गी श्रद्धांजलि भेंट कीती। इक सोशल मीडिया पोस्ट च राश्ट्रपति मुर्मू होरें आखेआ जे भारती सैनिकें दा अदम्य साहस, पक्का धेइया ते सर्वोच्च देशप्रेम भारती सशस्त्र बलें दी बेहतरी रिवायतें दी मिसाल ऐ।

<><><><><><>

### Rajnath Vijay Diwas

रक्षा मंत्री राजनाथ सिंह होरें आतंकवाद गी अपनी सरकारी नीति दा हिस्सा बनाने लेई पाकिस्तान दी सख्त नुख्ताचीनी कीती ऐ ते आखेआ ऐ जे पाकिस्तान दे नजैज कब्जे आले जम्मू-कश्मीर दे अलावा उस मुलखे कन्नै कोई गल्लबात नेई होग। अज्ज कारगिल विजय दिवस दी 27मीं बरेगंड दे मौके पर लद्दाख दे द्रास च कारगिल युद्ध स्मारक पर बोलदे होई राजनाथ सिंह होरें कारगिल युद्ध च भारत दी जित्त गी देसै दे ताज पर जड़े दा हीरा करार दित्ता। रक्षा मंत्री होरें आखेआ जे आपरेशन संदूर नै इस गल्लै गी साफ दस्सी दित्ता ऐ जे भारत गी आतंकवाद कन्नै धमकाने दी कोश्ट करने आलें दा केहू हशर होग। उनें आखेआ जे पाकिस्तान आसेआ कीते जाने आले कुसै बी भैड़े मनसूबे दा भारत इस चाल्ली परता देग जेहदी उन्नै कदें कल्पना बी नेई कीती दी होग।

<><><><><><>

### Prahlad Takes Charge

केंद्री मंत्री प्रहलाद जोशी होरें धर्मेंद्र प्रधान हुंदे इस्तीफे दे बाद नमें शिक्षा मंत्री दा पदभार सांभी लैता ऐ। जोशी होर इसलै उपभोक्ता मामले, खाद्य ते लोक वितरण ते परतिए इस्तेमाल होन आहली उर्जा मंत्री दे तौर पर कम्म करा'रदे ना। घोशणा दे बाद जोशी होरें आखेआ जे ओहू मेदें पर खरा उतरने दी पूरी कोश्ट करडन।

### CJP-withdraws Agitation

एहदे शा पैहले सी.जे.पी नै सरकार आसेआ उंदी मंगां मन्ने जाने दे बाद अपना प्रदर्शन बंद करी दित्ता हा। केंद्री मंत्री जे.पी नड्डा ते डा. जितेंद्र सिंह होरें परीक्षा प्रणली च सुधार ते पेपर लीक पर रोक लाने बारै मंगें पर आधारित सी.जे.पी प्रतिनिधिमंडल कन्नै त्रीए दौर दी गल्लबात कीती ही।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

### Public Exam Bills

सरकार कल लोकसभा च लोक स्तेहान संशोधन बिल-2026 पेश करग। सोमवार आस्तै बिल गी संसद दे कम्मकाज च पूश कीता गेआ ऐ। इस बिल दा मकसद लोक स्तेहान कनून-2024 गी संशोधन करना ऐ। केंद्री मंत्री डा. जितेंद्र सिंह होर इस बिल गी पेश करडन। शुक्रवारें केंद्री मंत्रिमंडल नै फास्ट ट्रैक कोर्ट लाने आस्ते बिल ड्राफ्ट कीता हा।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

### MEA

विदेश मंत्रालय दी फैक्ट चैक यूनिट नै सोशल मीडिया पर चला'रदी खबरें दा खंडन कीता ऐ जेदे च दावा कीता गेआ हा जे मंत्रालय दे प्रवक्ता रणधीर जायसवाल होरें आखेआ ऐ जे दिल्ली दे जंतर मंतर पर हालिया प्रदर्शनें दे पिच्छे कोई विदेशी फंडिंग नेई ऐ। फैक्ट चैक यूनिट नै आखेआ ऐ जे नेई खबरां झूठियां न ते प्रवक्ता दे बयान गी गलत तरीके कन्नै पेश करदियां ना।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

### Pak-Monsoon Deaths

पाकिस्तान च मानसून करी होई दी मौतें दी गिनतरी 97 तगर पुज्जी गेई ऐ। राश्ट्री आपदा प्रबंधन प्राधिकरण दे मूजब पूर्वी पंजाब प्रांत इस दरान बुरी चाल्ली प्रभावित रेया ते इत्थे 7 मौतें ते 20 लोक घायल होए ना। दक्खन सिंध च 2 जनें दी मौत ते 2 जखमी होए ना। खैबर पखतूनखवा ते पाकिस्तान दे कब्जे आहले गिलगित बाल्तिस्तान क्षेत्र थमां बी 1-1 मौत दर्ज कीती गेई ऐ। पिछले महीने दी 26 तरीक थमां शुरू मानसून दे चलदे अजें धोड़ी 297 लोक भारी बरखा करी होए दे हादसें च जखमी होए ना।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

### UNESCO-Heritage List

यूनेस्को नै अज्ज विश्व युद्ध द्वितीय डी-डे फ्रांस दे तटें, ग्रीस दी माउंट ओलंपस, जपान दे प्राचीन राजधानियां असूका ते फूजीवारा, दक्खन सूडान दे बोमा बाडीनगीलो पलायन क्षेत्र गी विश्व धरोहर सूची च शामिल कीता ऐ। इनें थाहरें गी मंजूरी यूनेस्को कमेटी दी बूसान, दक्खन कोरिया च होई दी बैठक च दिती गेई। नमीं शामिल कीती गेदी थाहरां सांस्कृतिक ते प्राकृतिक धरोहर दी पंदान ना।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

## CWG-Weight lifting

चला'रदी कामनवेलथ गेम्स च भारत दे ऋषिकांता सिंह चनमबाम नै पुरुषें दी 60 किलोग्राम भार चुक्कने दे मुकाबले च ग्लासगो च अज्ज चांदी दा तगमा जित्तेआ। ऋषिकांता नै 121 किलो भार चुक्कियै कामन वेलथ गेम्स च नमां रिकार्ड कायम कीता ते एह्दे शा पैहले मलेशिया दे मोहम्मद अनीक कास्दान नै एह्दी बराबरी कीती। तोआई, भारती खडारी नै 145 किलो भार चुक्कियै 264 किलो भार पर खत्म कीता। मलेशिया दे मोहम्मद अनीक कास्दान नै 273 किलो भार दे चुक्कने दे कन्नै सुन्ने दा तगमा ते कीनिया दे जोशुया अमुंगा म्बोया नै कुल 260 किलो भारत चुक्कियै कैऽ दा तगमा जित्तेआ। एह्दे शा पैहले पैरा खडारी झांडू कुमार नै पुरुषें दे भार चुक्कने दे मुकाबले च कैऽ दा तगमा जित्तियै भारत दा खात खोलेआ हा।

<><><><><><>

## Murmu-Return

राश्ट्रपति द्रौपदी मुर्मू मोल्दोवा, उत्तर मैसेडोनिया ते रोमानिया दी सरकारी जात्तरा सम्पन्न करियै अज्ज बडुलै नमीं दिल्ली परतोई आइयां ना। जात्तरा दे दरान राश्ट्रपति होरें त्रोंनै मुल्खें दे राश्ट्र अध्यक्षें कन्नै डेलीगेशन स्तरै दी गल्लबात कीती ते दपक्खी सरबंधें गी मजबूत बनाने दे कन्नोकन्नी बपार, शिक्षा, डिजिटल, तकनीकें, नमिंए काह्डें ते नवीकरणी उर्जा जनेहू खेत्तरें च सहयोग बधाने पर चर्चा कीती। एहू मोल्दोवा ते उत्तर मैसेडोनिया दी कुसै भारती राश्ट्रपति हुं'दी पैहली-पैहली सरकारी जात्तरा ही जिसले के रोमानिया दी त्रै दाहकें शा मते समें दे बाद कुसै भारती राश्ट्रपति हुं'दी एहू पैहली सरकारी जात्तरा रेई।

<><><><><><>

## EAM-Advisory

विदेश मंत्रालय नै अज्ज इक सला जारी करियै काला सागर क्षेत्र च चलने आहले जां उत्थुआं लंगघने आहले ज्हाजें पर रोजगार करने दे इच्छुक भारती नागरिकें गी आग्रह कीता ऐ जे ओहू नेआ कार्यभार साम्भने शां पैहले मौजूदा सुरक्षा जोखिमें दा पूरी सावधानी कन्ने आंकलन करी लैन। सलाह च आखेआ गेआ ऐ जे ऐसली नौकरियें दा चुनाऽ करने आहलें गी बड़ी मती सावधानी बरतनी लोडचदी ऐ। चला'रदे संघर्ष करी काला सागर ते आले7दोआले दे समुंद्री क्षेत्रें च सुरक्षा स्थिति बड़ी मती अस्थिर बनी दी ऐ। इनें जल क्षेत्रें च चलने आहले जां उत्थुआं लंगघने आहले ज्हाजें गी मिसाइल ते ड्रोन हमले सने महत्वपूर्ण सुरक्षा जोखिमें दा सामना करना पवा'रदा ऐ। अपनी सलाह च मंत्रालय नै आखेआ ऐ जे जिनें भारती नागरिकें गी काउंसलर मदाद दी लोड ऐ, ओहू क्षेत्र च स्थित भारती दूतावास कन्नै संपर्क करै।

<><><><><><>

## IMD

भारती मौसम विभाग नै अज्ज ओडिशा ते महाराष्ट्र च भारी बरखा पौने दा रेड अलर्ट जारी कीता ऐ। मौसम विभाग नै छत्तीसगढ़, गुजरात कोंकण, ते गोवा च अगले दो-त्रै दिन भारी थमां बड़ी मती भारी

बरखा दी पेशनगोई कीती ऐ। इयां गै समुंद्री आंध्र प्रदेश, पूर्वी मध्य प्रदेश, पच्छिम बंगाल ते हिमाचल प्रदेश च बी अज्ज भारी बरखा दी मेद ऐ।

<><><><><><>

## NHW

जम्मू-श्रीनगर राश्ट्री जरनैली शिड़क एन.एच 44 अज्ज यातायात लेई बंद रेआ कीजे बनिहाल दे गांगरू हिस्से च पस्सियां पौने करी क्षतिग्रस्त हिस्से च मरम्मत दा कम्म जारी ऐ। कल संझा ल्हास-पस्सियां पौने करी जरनैली शिड़क गी यातायात लेई बंद रक्खेआ गेआ हा। शिड़क थमां मलबा हटाने दा कमम जारी ऐ पर इलाके च पस्सियां पौने करी जरनैली शिड़क गी बंद गै रक्खेआ गेदा ऐ।

<><><><><><>

## LG

उपराज्यपाल मनोज सिन्हा होरें आखेआ जे इक शांतिपूर्ण ते समृद्ध समाज दे निर्माण लेई अध्यात्मक मूल्लें गी माह्नुएं ते संस्थानें दवें दा मार्गदर्शन करना लोड़चदा ऐ। उनें आखेआ जे सच्ची भक्ति मानवता दी सेवा, इक दुए दा सम्मान ते निस्वार्थ प्यार च गै झलकदा ऐ। दक्खनी कश्मीर दे अनंतनाग जिले च तीर्थ राज लोकभवन च सलाना हरवाह उत्सव दरान श्रद्धालुएं गी संबोधित करदे होई एल.जी होरें एहू गल्ल आक्खी। ए.जी होरें माता सिद्ध लक्ष्मी मंदरै च मत्था टेकेआ ते हवन च शामिल सबनें लोकें गी मुबारकबाद दिती। उपराज्यपाल होरें आखेआ जे हरवाह उत्सव, समर्पण, भक्ति भावना, अधूरी अध्यात्मक अनुभव दा इक अनोखा संगम ऐ। उनें इस तीर्थ स्थल गी भारत दी कदें बी खत्म नेई होने आहली अध्यात्मिक परम्पराएं दा प्रतीक दस्सेआ।

<><><><><><>